



中国经典名著

全唐诗

(十六)

黄怀仁 齐思明 校正

学苑音像出版社

目 录

第二百九十八卷.....	1
第二百九十九卷.....	28
第三百卷.....	43
第三百零一卷.....	73
第三百零二卷.....	108
第三百零三卷.....	120
第三百零四卷.....	137
第三百零五卷.....	155
第三进零六卷.....	167
第三百零七卷.....	175
第三百零八卷.....	187
第三百零九卷.....	190
第三百一十卷.....	194
第三百一十一卷.....	215
第三百一十二卷.....	220
第三百一十三卷.....	225
第三百一十四卷.....	235
第三百一十五卷.....	244
第三百一十六卷.....	251
第三百一十七卷.....	273
第三百一十八卷.....	308

第二百九十八卷

凉州行

王建

凉州四边沙皓皓，汉家无人开旧道。边头州县尽胡兵，
将军别筑防秋城。万里人家皆已没，年年旌节发西京。
多来中国收妇女，一半生男为汉语。蕃人旧日不耕犁，
相学如今种禾黍。驱羊亦著锦为衣，为惜毡裘防斗时。
养蚕缲茧成匹帛，那堪绕帐作旌旗。城头山鸡鸣角角，
洛阳家家学胡乐。

寒食行

王建

寒食家家出古城，老人看屋少年行。丘垄年年无旧道，
车徒散行入衰草。牧儿驱牛下冢头，畏有家人来洒扫。
远人无坟水头祭，还引妇姑望乡拜。三日无火烧纸钱，
纸钱那得到黄泉。但看垄上无新土，此中白骨应无主。



促刺词（一作促促行）

王建

促刺复促刺，水中无鱼山无石。少年虽嫁不得归，
头白犹著父母衣。田边旧宅非所有，我身不及逐鸡飞。
出门若有归死处，猛虎当衢向前去。百年不遣踏君门，
在家谁唤为新妇。岂不见他邻舍娘，嫁来常在舅姑傍。

垄头水

王建

垄水何年垄头别，不在山中亦呜咽。征人塞耳马不行，
未到垄头闻水声。谓是西流入蒲海，还闻北去绕龙城。
垄东垄西多屈曲，野麋饮水长簇簇。胡兵夜回水旁住，
忆著来时磨剑处。向前无井复无泉，放马回看垄头树。

北邙行（一作北邙山）

王建

北邙山头少闲土，尽是洛阳人旧墓。旧墓人家归葬多，
堆著黄金无买处。天涯悠悠葬日促，冈坂崎岖不停轂。
高张素幕绕铭旌，夜唱挽歌山下宿。洛阳城北复城东，



魂车祖马长相逢。车辙广若长安路，蒿草少于松柏树。
涧底盘陀石渐稀，尽向坟前作羊虎。谁家石碑文字灭，
后人重取书年月。朝朝车马送葬回，还起大宅与高台。

温泉宫行

王建

十月一日天子来，青绳御路无尘埃。宫前内里汤各别，
每个白玉芙蓉开。朝元阁向山上起，城绕青山龙暖水。
夜开金殿看星河，宫女知更月明里。武皇得仙王母去，
山鸡昼鸣宫中树。温泉泱泱出宫流，宫使年年修玉楼。
禁兵去尽无射猎，日西麋鹿登城头。梨园弟子偷曲谱，
头白人间教歌舞。

春词

王建

红烟满户日照梁，天丝软弱虫飞扬。菱花霍霍绕帷光，
美人对镜著衣裳。庭中并种相思树，夜夜还栖双凤凰。



辽东行

王建

辽东万里辽水曲，古戍无城复无屋。黄云盖地雪作山，
不惜黄金买衣服。战回各自收弓箭，正西回面家乡远。
年年郡县送征人，将与辽东作丘坂。宁为草木乡中生，
有身不向辽东行。

塞上梅

王建

天山路傍一株梅，年年花发黄云下。昭君已歿汉使回，
前后征人惟系马。日夜风吹满陇头，还随陇水东西流。
此花若近长安路，九衢年少无攀处。

戴胜词

王建

戴胜谁与尔为名，木中作窠墙上鸣。声声催我急种谷，
人家向田不归宿。紫冠采采褐羽斑，衔得蜻蜓飞过屋。
可怜白鹭满绿池，不如戴胜知天时。



秋千词

王建

长长丝绳紫复碧，袅袅横枝高百尺。少年儿女重秋千，
盘巾结带分两边。身轻裙薄易生力，双手向空如鸟翼。
下来立定重系衣，复畏斜风高不得。傍人送上那足贵，
终赌鸣珰斗自起。回回若与高树齐，头上宝钗从堕地。
眼前争胜难为休，足踏平地看始愁。

开池得古钗

王建

美人开池北堂下，拾得宝钗金未化。凤凰半在双股齐，
钿花落处生黄泥。当时堕地觅不得，暗想窗中还夜啼。
可知将来对夫婿，镜前学梳古时髻。莫言至死亦不遗，
还似前人初得时。

赛神曲

王建

男抱琵琶女作舞，主人再拜听神语。新妇上酒勿辞勤，
使尔舅姑无所苦。椒浆湛湛桂座新，一双长箭系红巾。



但愿牛羊满家宅，十月报赛南山神。青天无风水复碧，
龙马上鞍牛服轭。纷纷醉舞蹈衣裳，把酒路旁劝行客。

田家留客

王建

人家少能留我屋，客有新浆马有粟。远行僮仆应苦饥，
新妇厨中炊欲熟。不嫌田家破门户，蚕房新泥无风土。
行人但饮莫畏贫。明府上来何苦辛。丁宁回语屋中妻，
有客勿令儿夜啼。双豕直西有县路，我教丁男送君去。

精卫词

王建

精卫谁教尔填海，海边石子青磊磊。但得海水作枯池，
海中鱼龙何所为。口穿岂为空衔石，山中草木无全枝。
朝在树头暮海里，飞多羽折时堕水。高山未尽海未平，
愿我身死子还生。



老妇叹镜

王建

嫁时明镜老犹在，黄金镂画双凤背。忆昔咸阳初买来，
灯前自绣芙蓉带。十年不开一片铁，长向暗中梳白发。
今日后床重照看，生死终当此长别。

望夫石

王建

望夫处，江悠悠。化为石，不回头。
上头日日风复雨，行人归来石应语。

别鹤曲

王建

主人一去池水绝，池鹤散飞不相别。青天漫漫碧水重，
知向何山风雪中。万里虽然音影在，两心终是死生同。
池边巢破松树死，树头年年乌生子。



乌栖曲

王建

章华宫人夜上楼，君王望月西山头。

夜深宫殿门不锁，白露满山山叶堕。

雉将雏

王建

雉咿喔，雏出□。毛斑斑，觜啄啄。学飞未得一尺高，
还逐母行旋母脚。麦垄浅浅难蔽身，远去恋雏低怕人。
时时土中鼓两翅，引雏拾虫不相离。

白紵歌二首

王建

天河漫漫北斗璨，宫中乌啼知夜半。新缝白紵舞衣成，
来迟邀得吴王迎。低鬟转面掩双袖。玉钗浮动秋风生。
酒多夜长夜未晓，月明灯光两相照。后庭歌声更窈窕。
馆娃宫中春日暮，荔枝木瓜花满树。城头乌栖休击鼓，
青娥弹瑟白紵舞。夜天曈曈不见星，宫中火照西江明。



美人醉起无次第，堕钗遗珮满中庭。此时但愿可君意，
回昼为宵亦不寐。年年奉君君莫弃。

短歌行

王建

人初生，日初出。上山迟，下山疾。百年三万六千朝，
夜里分将强半日。有歌有舞须早为，昨日健于今日时。
人家见生男女好，不知男女催人老。短歌行，无乐声。

饮马长城窟

王建

长城窟，长城窟边多马骨。古来此地无井泉，
赖得秦家筑城卒。征人饮马愁不回，长城变作望乡堆。
蹄踪未干人去近，续后马来泥污荆枕弓睡著待水生，
不见阴山在前阵。马蹄足脱装马头，健儿战死谁封侯。

乌夜啼

王建

庭树乌，尔何不向别处栖，夜夜夜半当户啼。



家人把烛出洞户，惊栖失群飞落树。一飞直欲飞上天。
回回不离旧栖处。未明重绕主人屋，欲下空中黑相触。
风飘雨湿亦不移，君家树头多好枝。

簇蚕辞

王建

蚕欲老，箔头作茧丝皓皓。场宽地高风日多，
不向中庭□蒿草。神蚕急作莫悠扬，年来为尔祭神桑。
但得青天不下雨，上无苍蝇下无鼠。新妇拜簇愿茧稠，
女洒桃浆男打鼓。三日开箔雪团团，先将新茧送县官。
已闻乡里催织作，去与谁人身上著。

渡辽水

王建

渡辽水，此去咸阳五千里。来时父母知隔生，
重著衣裳如送死。亦有白骨归咸阳，营家各与题本乡。
身在应无回渡日，驻马相看辽水傍。



空城雀

王建

空城雀，何不飞来人家住，空城无人种禾黍。
土间生子草间长，满地蓬蒿幸无主。近村虽有高树枝，
雨中无食长苦饥。八月小儿挟弓箭，家家畏向田头飞。
但能不出空城里，秋时百草皆有子。报言黄口莫啾啾，
长尔得成无横死。

水运行

王建

西江运船立红帜，万棹千帆绕江水。去年六月无稻苗，
已说水乡人饿死。县官部船日算程，暴风恶雨亦不停。
在生有乐当有苦，三年作官一年行。坏舟畏鼠复畏漏，
恐向太仓折升斗。辛勤耕种非毒药，看著不入农夫口。
用尽百金不为费，但得一金即为利。远征海稻供边食，
岂如多种边头地。



当窗织

王建

叹息复叹息，园中有枣行人食。贫家女为富家织。
翁母隔墙不得力。水寒手涩丝脆断，续来续去心肠烂。
草虫促促机下啼，两日催成一匹半。输官上顶有零落，
姑未得衣身不著。当窗却羡青楼倡，十指不动衣盈箱。

失钗怨

王建

贫女铜钗惜于玉，失却来寻一日哭。嫁时女伴与作妆，
头戴此钗如凤凰。双杯行酒六亲喜，我家新妇宜拜堂。
镜中乍无失髻样，初起犹疑在床上。高楼翠钿飘舞尘，
明日从头一遍新。

春燕词

王建

新燕新燕何不定，东家绿池西家井。飞鸣当户影悠扬，
一绕檐头一绕梁。黄姑说向新妇女，去年堕子污衣箱。



已能辞山复过海，幸我堂前故巢在。求食慎勿爱高飞，
空中饥鸢为尔害。辛勤作窠在画梁，愿得年年主人富。

主人故池

王建

高池高阁上连起，荷叶团团盖秋水。
主人已远凉风生，旧客不来芙蓉死。

古宫怨

王建

乳乌哑哑飞复啼，城头晨夕宫中栖。
吴王别殿绕江水，后宫不开美人死。

关山月

王建

关山月，营开道白前军发。冻轮当碛光悠悠，
照见三堆两堆骨。边风割面天欲明，金沙岭西看看没。



赠离曲

王建

合欢叶堕梧桐秋，鸳鸯背飞水分流。少年使我忽相弃。
雌号雄鸣夜悠悠。夜长月没虫切切，冷风入房灯焰灭。
若知中路各西东，彼此不忘同心结。收取头边蛟龙枕，
留著箱中双雉裳。我今焚却旧房物，免使他人登尔床。

宛转词

王建

宛宛转转胜上纱，红红绿绿苑中花。
纷纷泊泊夜飞鸦，寂寂寞寞离人家。

水夫谣

王建

苦哉生长当驿边，官家使我牵驿船。辛苦日多乐日少，
水宿沙行如海鸟。逆风上水万斛重，前驿迢迢后淼淼。
半夜缘堤雪和雨，受他驱遣还复去。衣寒衣湿披短蓑，
臆穿足裂忍痛何。到明辛苦无处说，齐声腾踏牵船出。



一间茆屋何所直，父母之乡去不得。我愿此水作平田，
长使水夫不怨天。

田家行

王建

男声欣欣女颜悦，人家不怨言语别。五月虽热麦风清，
檐头索索缲车鸣。野蚕作茧人不取，叶间扑扑秋蛾生。
麦收上场绢在轴，的知输得官家足。不望入口复上身，
且免向城卖黄犊。回家衣食无厚薄，不见县门身即乐。

去妇

王建

新妇去年胼手足，衣不暇缝蚕废簇。白头使我忧家事，
还如夜里烧残烛。当初为取傍人语，岂道如今自辛苦。
在时纵嫌织绢迟，有丝不上邻家机。

神树词

王建

我家家西老棠树，须晴即晴雨即雨。四时八节上杯盘，

